

von Wulf Wager

# Tiroler Schlitzohrdohtor



Noch dr Fasnet war i mit meiner Frau en Tirol em Urlaub. Dort semmr Schneeschuhwandert, hend g'wellnesst - also pudelnäggich en ma hoißa Holzzeimer gschwitzt ond drnoch mit eiskaltem Wasser abgeschbritzt - ond i ben Langlaufski gfahra. Mei Frau net, dia hasst Bewegung, wo mr ens Schwitza kommt. Derra hot dia Sauna glangt. Wo i no 's zwoite Mol uf de Ski gstanda ben ond a rond

12 Kilometer lange Tour en a schee's Tal am Karwendel gmacht han, semmr uf am Hoimweg meine Kräfte zur Neige ganga. Weil's bei dr Neifahrt en des Tal bloß ufwärts ganga isch, war jo klar, dass es beim retour abwärts goht. Des war au echt schee, aber uf de letschte Meter isch oiner vor mir en dr Loipe gfahra, der ebbes langsamer war wie i. Also han i d' Spur gwechselt - oder wechsla wella. Jedafalls hend sich meine Ski verkantet ond uf oimol war i langsamer wie der vor mir, weil i nämlich mit am Gsicht direkt en da Schnee ghagelt be ond i a ghörige Portio Schnai gfressa han. Mi hots gschwend derartig zerbrösel. Do drbei han i mi aber mit de Händ abgestützt ond i han mr - zumindescht an dr rechta Hand - ghörig waih dau. An Schwob kennt aber koin Schmerz, also ben i vollends hoim ens Hotel gfahra ond han mi dort noch ra elastische Binde erkundigt. Des hend dia aber net ghet. Deshalb ben i am näggschda Morga in d' Apotheke, dia vom dortiga Doktor betriebe wird. Dia Schweschtra hend gsait, des mi ass sich dr Doktr gschwend agucka. Also hot sich des Tiroler Schlitzohrdohterle mei Handglenk aguckt, oimol fescht druggt, dass i gmoint han, i hör d' Weihnachtsengel senga, ond no gsait, dass mr des röntga miass. Gschickterweis hot der a obenützts Röntgagerät romstand ghet. Also hot er mir so a Bockschürzle romghängt ond des Bildle gmacht. Zoigt hot er mir's net! Mit ra CD isch er no wieder komma, hoit gsait, dass des Handglenk brocha wär ond er mir jetzt en Gips no macht. Sechs Woche miass i den jetzt traga. I han denkt, i hör net recht. Domit war onser Ski- lauf- ond Schneeschuuhwanderurlaub zuende. De greschte Schlag han i aber kriagt, wo der mir dia Rechnung ufgmacht hot: 850,- Eura hot des alles koschtet. Fir 20 Minuta!!! Jonger des isch a Stondalohn! "Karte oder Bares", hot dia Schweschter gsait. I dät mir des jo wieder von meira Auslandskrankaversicherung hola kenna. Also hemmr noch vier Tag den ursprünglich auf 10 Tag geplanta Urlaub abbrocha. Schweren Herzens. Drhoim ben i glei zu meim Orthopäde, der sich die CD hot gäba lassa ond die Bildla aguckt hot. Er dät koin Bruch seha. Zur Sicherheit soll i aber no gschwend ens CT ganga. Aber au dort hot mr nix voma Bruch gsäah. Des war oifach bloß a starke Verstauchung.

Mei Urlaub war vorbei, en Haufa Geld hot's koscht ond en Haufa Zeit ben i en irgendwelche Wartezeimr romgsässa, bloß weil so a Tiroler Schlitzohrdohter da schnelle Reibach hot macha wella. Den soll dr Blitz beim Scheißa treffa. Bis näggschd Woch´

Ihr Wulf Wager

Alle Kolumna zom Nochlesa onder: [www.woascht.de](http://www.woascht.de)